

Na osnovu člana 13. stav (2) alineja 9. Zakona o principima lokalne samouprave (Službene novine FBiH“ broj:49/06 i 51/09), člana 21. tačka 11. Statuta Grada Zenica („Službene novine Grada Zenica“ broj:5/15), Gradsko vijeće Grada Zenica na _____sjednici održanoj dana _____ godine, donosi

P R A V I L N I K

o kriterijima i postupku za određivanje naziva ulica, trgova, mostova i parkova na području grada Zenica

Član 1.

Ovom Pravilnikom se utvrđuju načela, kriteriji, postupak i način davanja i izmjene naziva ulica, trgova, mostova i parkova na području grada Zenica (u daljem tekstu: Grad).

Član 2.

Inicijativu za davanje ili izmjenu naziva iz člana 1. ovog Pravilnika mogu podnijeti:

- Gradonačelnik
- Vijećnici Gradskog vijeća
- Savjeti mjesnih zajednica
- Javne institucije
- Ustanove
- Organizacije civilnog društva i druge pravne osobe

Član 3.

Inicijativa iz prethodnog člana upućuje se Predsjedavajućem Gradskog vijeća koji je dostavlja nadležnom radnom tijelu - Komisiji za obilježavanje značajnih datuma, događaja i ličnosti Gradskog vijeća (u daljem tekstu Komisija).

Član 4.

Inicijativa se podnosi u pisanom obliku sa obrazloženjem koje mora sadržavati:

- postojeći naziv,
- prijedlog novog naziva,
- detaljno obrazloženje sa razlozima za promjenu ili davanje naziva,
- tekstualan opis sa osnovnim podacima o lokaciji i graničnim tačkama ulice, trga, mosta ili parka,
- razloge zbog kojih se predlaže taj naziv,

Član 5.

(1) Kad se inicijativa odnosi na ime neke osobe ista mora sadržavati osnovne biografske podatke i one podatke koji se odnose na doprinos navedene osobe razvoju Grada.

(2) Ulica, trg, most ili park ne može dobiti naziv po imenu žive osobe.

Član 6.

Ukoliko inicijativa ne bude podnesena u skladu sa odredbama člana 4. i 5. ovog Pravilnika neće se uzeti u razmatranje.

Član 7.

(1) Prilikom razmatranja inicijative Komisija ocjenjuje kvalitet predloženog naziva i njegovu sadržajnost. Sadržajnost prijedloga ogleda se u uvažavanju zastupljenosti naziva kako iz starije tako i novije historije Grada i BiH i potrebe očuvanja bitnih vrijednosti demokratskog društva.

(2) Prilikom predlaganja imena osobe kvalitet predloženog naziva ogleda se u liku i djelu te osobe, njenom neposrednom i posrednom uticaju na prošlost, sadašnjost i budućnost Grada i/ili BiH.

Član 8.

Komisija se prilikom razmatranja inicijative rukovodi sljedećim načelima:

- Uvažavanje izvornih rješenja naziva ulica, trgova, mostova i parkova iz vremena kada su izgrađeni, kao i naziva koji su tokom historije postali dio svijesti i tradicije građana,
- Da se nepotrebno više puta ne mijenja naziv,
- Uvažavanje potreba grupisanja imena ulica i trgova radi kvalitetne orijentacije,
- Da nazivi po mogućnosti budu što kraći kako bi odgovarali programima za izdavanje identifikacionih dokumenata građana.

Član 9.

Kriteriji za dodjelu ili izmjenu naziva ulica, trgova, mostova i parkova određuju se po:

- Geografskim pojmovima (grad, rijeka, toponim i sl.),
- Datumima vezanim za značajne događaje iz historije Grada i/ili BiH,
- Imenima osoba koje su dale značajan doprinos u historiji Grada i/ili BiH,
- Imenima formacija, slavnim komadantima jedinica i drugim istaknutim pojedincima u organizovanju odbrane i odbrani iz perioda odbrambeno-oslobodilačkog rata 92-95,
- Imenima osoba koje su dale svoj doprinos u kulturnom, privrednom, društvenom, sportskom i naučnom razvoju Grada i/ili BiH (osvojene nagrade),
- Prema ranijem historijskom nazivu.

Član 10.

(1) Prilikom razmatranja inicijative Komisija je u obavezi pribaviti mišljenje:

- Stalnih tijela Gradskog vijeća Grada za određenu oblast,
- Savjeta mjesne zajednice (ukoliko isti nije podnosilac inicijative), sa područja gdje je potrebno dodijeliti ili izmijeniti naziv,
- Udruženja boraca čija su sjedišta na području Grada, ukoliko se radi o davanju imena u skladu sa kriterijima iz člana 8. alineja 4.,
- Saglasnost porodice ukoliko se radi o davanju imena u skladu sa kriterijima iz člana 5. Pravilnika

(2) Komisija u proceduri razmatranja inicijative može cijeniti potrebu pribavljanja mišljenja od stručnih ustanova i institucija za određene oblasti.

Član 11.

(1) Komisija utvrđuje prijedlog zaključka kojim daje mišljenje da li su ispunjeni uslovi za davanje ili izmjenu naziva iz člana 1. ovog Pravilnika i isti dostavlja Gradskom vijeću na razmatranje i utvrđivanje konačnog mišljenja.

(2) Vijeće na sjednici donosi zaključak kojim se inicijativa odbija ili prihvata i određuje način pripreme i nosioce izrade akta.

Član 12.

Naziv dodjeljen ili izmijenjen u skladu sa odredbama ovog Pravilnika, ne može biti ponovo mijenjan najmanje 10 godina, od dana davanja ili izmjene.

Broj:
Zenica,

PREDSJEDAVAJUĆI
GRADSKOG VIJEĆA ZENICA

Mirza Husetić

Obrazloženje

PRAVNI OSNOV

Pravni osnov za donošenje Pravilnika o kriterijima i postupku za određivanje naziva ulica, trgova, mostova i parkova na području grada Zenica sadržan je odredbama člana 13. alineja 9. Zakona o principima lokalne samouprave („Službene novine FBiH“ broj:49/06 i 51/09) i člana 21. tačka 11. Statuta Grada Zenica („Službene novine Grada Zenica“, broj: 05/15), u kojima je regulisano da organ odlučivanja jedinice lokalne samouprave Gradsko vijeće donosi odluke o organizaciji mjesne samouprave i nazivima ulica, trgova i naseljenih mjesta.

RAZLOZI ZA DONOŠENJE

Razlozi za donošenje ovog Pravilnika proizašli su iz inicijative vijećnika Malika Ejubovića usvojene Zaključkom Gradskog vijeća broj: 01-45-7136/21 od 08.04.2021. godine, a kojom je imenovani vijećnik tražio preimenovanje jedne od građevina ili izgradnju spomen-obilježja u Gradu Zenica za žrtve genocida u Srebrenici.

Postojeći nazivi ulica, bulevara, trgova i mostova utvrđeni su Rješenjem o utvrđivanju novih naziva ulica, bulevara, trgova i mostova („Službene novine općine Zenica“ broj: 4/06-prečišćen tekst, 5/06, 3/09 i 8/10). Istim rješenjem iz 2006. godine utvrđeno je da plan i kriterije za obilježavanje naziva donosi Komisija Skupštine opštine za obilježavanje državnih praznika i značajnih događaja i ličnosti.

Kako ne postoje propisani kriteriji na osnovu kojih bi nadležno radno tijelo Gradskog vijeća utvrdilo i predložilo davanje ili izmjenu naziva ulica, bulevara, trgova i mostova Gradsko vijeće je donijelo gore navedeni zaključak i zadužilo izvršioca da se utvrde procedure i sačini odgovarajući pravilnik sa kriterijima.

Služba za boračko-invalidsku i socijalnu zaštitu, stambene poslove i društvene djelatnosti